

石田先生文集

九



石田先生文集卷第十一



碑誌

皇元勅賜贈翰林學士杜文獻公神道
碑

相之安陽縣王裕里有處士杜絳山之墓既葬
之六十六年當天曆己巳皇贈處士官翰林學
士階資德大夫勲上護軍爵魏國公謚文獻越
六年元統甲戌皇又詔臣祖常製其墓之碑臣
彛書其碑之字以賜其曾孫臣秉彛使刻臣受
詔按監察御史臣蘇天爵序公言行之狀為文

卷二

曰公諱瑛字文玉其先霸州人金將亡士少識
時變猶以業文辭規進取而公獨自霸州之信
安辟地河南絳氏山中於天下書靡不讀讀靡
不記靡不見其趣詣上下今古於得失否臧之
悉靡有不究其心皆無衆人之存而若有待於
世金亡顛額暴嵬畝仕者鹿兔走血氣不得寧
而公獨間關轉徙以詩書從容授徒汾晉間故
中書粘合珪開府于相以書幣聘公至獨教以
緩刑薄斂廣學內士興滯補弊以脩扞其民而
卒以基平宗之會國朝歲己未

世祖觀政江南至相召公問計公對以謂漢唐以還天下之趨舍安危顧法與食與兵三者而已國無法不紀人無食不命亂無兵不守三者而君之恃也今宋蔑之殆將亡矣以宋之將亡而興之在聖主天命必得今若控襄樊之師委戈下游以倒其背而無縮於銳是縣車束馬而大業定矣更勸上數事以為事不爾後當如此上內之心賢公謂可屬以大用既皆如云江南平即使至相徵公聞王文統當國輒引避使索不見近臣奏起公為大名彰德懷孟等路提舉學

校官辭不就或諭使仕則曰後之世雖去古之世遠而先王之所以設施制度其本末先後未嘗有異也今不能因天下之哀苦以變更後世之弊政以趨合先王之意勢焉而已其勢豈易易復古哉吾又不能窺時儻仰以赴機縈之會仕奚從益於是杜門謝客著書窮學於世之貴富賤貧一無所動其心以優游厭飫於道藝以終其身以歿嗚呼公之言若此其尤可以窺公之志也其所著有春秋地里原委十卷語孟旁通八卷皇極引用八卷皇極疑事四卷極學十

卷律呂禮樂雜說三十卷其大略不以一身之窮而忘天下之憂以為不見其志於行事則將文以發其意文不克用於時則將以垂諸人後之人用吾言焉吾固不窮也公所為作之意若此公之志可知矣始公之學也有所待而迄不得一施以心蓋幾於遯世而不悔者歟其志若此其仕不至于耽祿而弊時審矣惜公之去而不試於事也公氣貌魁偉美須儀望之儼然爵祿器也既家於相中書畀以相之良田畝千不受術者言公居屋下當有黃金家人欲發視公

斥心之公去居者果得黃金百斤觀公之存於二事之廉若不足數然公之歿也既久其大者漸以無傳則其小者亦不得而略也公以至元十年九月十六日終于家壽七十終之日命諸子曰即死當題我曰處士杜緱山墓今首之碑從公志也公曾王父信王父植父時升母某氏配孫後公九年卒祔公墓子男三人處思甫寇卒處立郡文學處愿終東昌路推官有惠政女適李洪孫男又三人曰愚以子秉彝貴封奉議大夫樞密院判官驍騎尉安陽縣子曰堅曰欽

皆為士曾孫七人秉彝秉鈞秉直秉讓秉容秉
一秉德曾孫又二人洹漳嗚呼公之事遠矣故
雖詳公之言而所次心此然即此而公之為人
可見則亦豈得為略哉秉彝由丞相掾為奎章
閣典籤時與脩大典嘗錄公之事以送太史今
拜陝西行臺御史而

天子又賜公之碑以往焉相人見秉彝之來必
曰是魏公厚積之貲有曾孫賢其將大未艾則
不寧公有榮也秉彝亦賢後嗣哉我國家褒卹
寵嘉之意蓋益有徵矣故臣取其尤可以傳後

世者序之而為銘銘曰

明明

世后皇聞于天我征徂南捷捷其陳建我干旄
于洹之濱遑脂我車軌蒲殷殷魏公在野誰適
與謀學以待世靡恫靡羅維

世后聖聘公于遺后曰公賢庶幾其來南國之
痛我蒼天紀鳳鳴在雲魚泳于汜億億臣同盡
瘁以仕矧是藝括寧不我有公拜稽首匪臣有
辭降極瘼矣民殫胥疲誰言臣者而出位思大
德受命昭假靡遲在昔帝者監觀萬國法與食

兵燕民孔極宋嘻蔑矣孰其可追帝御六師以
匡不獲同我髦士簡我戎行鉤援戟鏃以臨樊
襄勿進而待勿愆于揚鏡其餒俘涉自漢陽纛
行騎翼咸予之域后納公言試靡有忒大命甫
集偃戈于革束帛詣公謂公來即彼何人斯公
胡罔憚皎皎白駒在彼空谷考槃朝謳願言韞
匱雖則韞匱懋勲有倣完題壽考以綏後祿公
在亂離人知書詩公發偉畫乃合天時有炳其
云有鬱其聞璣緘辟露後公之文公生靡崇歿
有多祀兆相之郊從以孫子既六十年樹石墓

五

卷十一

五

天子之賜曾孫之美曾孫之美追榮孔多有列
群獻公延爾那哀如之何矢詩不磨

翰林學士元文敏公神道碑

有元古文之宗曰翰林學士清河元公以至治
二年壬戌二月七日薨于位塋而墓碑未刻其
長子奉議大夫同知峽州路事晦又死次子嵩
七歲一女病而不嫁一孫尚乳也夫人清河郡
夫人李氏纍然抱其孫僦舩歸清河織紵以居
賓客僚隸皆四散無一人顧之者獨其友玄教

太宗師吳全節謂馬祖常曰清河公以文起家
可謂貴顯光榮矣而其塋之後無碑以載其官
闕世次行事之實爾宜為文我求善楷書者龔
石以刻焉祖常曰嗟乎世之士一得志則攘袂
於所親一不得志褫鬼若不能生者比比也今
子託跡老氏而以禮義之事振吾徒何能多言
以飾媿哉謹按公諱明善字復初資穎悟絕出
讀書目所過即記諸經皆有師法尤深於春秋
弱冠游吳中奮宗金季世之習已名能古文流
傳江淮間浙東部使者薦之行省辟正安豐路

學再正建康路學居歲餘行樞密院辟充令史
故辨章董公士選實僉院事敬之如賓不以曹
屬御之也董公遷江西行省左丞復羅致之省
中會贛賊劉貴反從左丞將兵討之擒賊三百
人議緩註誤得全活者百三十人又將斬一賊
命公臨斬左丞曰掾儒生能臨斬乎當震怖矣
終刑已色不變將佐白宜多戮人及尸一切死
者用張軍聲公固爭以為王者之師恭行天罰
若等小賊跳梁殺其渠魁耳餘何辜焉賊貴盜
書民丁十萬於籍有司喜欲發之公夜置火籍

藁中焚之以滅之贛吉遂安南行臺聞之亦辟
為掾未幾進登仕佐郎樞密院照磨轉中書省
左曹掾曹無留事坐誣免不辨僑寓淮南文學
益肄頊之坐誣事明復掾省曹至大戊申我
仁宗皇帝養德東朝左右文化選天下髦俊之
士列在宮臣公首被簡拔授承直郎太子文學
仁宗即皇帝位遷翰林待制承直郎兼國史院
編修官與修成廟實錄加奉議大夫是年陞翰
林直學士朝列大夫知制誥同脩國史有詔命
節書文譯其關政要者以進公請與宋忠臣子

集賢直學士文陞同譯潤書成每奏讀一篇上
必善之曰二帝三王之道非卿莫聞也

太皇太后既受尊號朝堂集議宜赦公曰數赦
非善人福宥過可也乘傳出賑山東河南饑
城下邳諸州連數十驛保馬民饑官無文書公
專以鈔萬二千定分給之民免死徙皇慶壬子
修武宗皇帝實錄明年遷翰林侍講學士中奉
大夫預議科舉服色延祐乙卯國家始策試士
子選充考官廷對又充讀卷官迅筆詳定試卷
數語辭義咸委曲精盡他人抒思者不及也改

禮部尚書正孔氏宗法以五十四世孫思晦襲封衍聖公事上制可之叅議中書省事毗贊良多知戊午貢舉復入翰林為侍讀學士通奉大夫歲中拜湖廣行省叅知政事便道過家上冢鄉之父老子第迎謁勞問禮意周洽庚申英宗踐祚徵入為集賢侍讀學士名至上都議廣廟制授翰林學士資善大夫脩仁廟實錄百官迎仁廟聖容云有卿雲見承詔為文以紀之賜酒加賞

英宗親裸太室禮官進祝冊奏請署御名上命

代署者三春遇褒優近世無有也既薨之三月歸葬于清河王家原之先塋西三里泰定間得請于朝贈資善大夫河南江北等處行中書省左丞追封清河郡公謚文敏曾祖諱興不仕曾祖妣楊氏二世以下皆以公貴祖諱海贈嘉議大夫秘書卿上輕車都尉追封清河郡侯謚貞惠祖妣高氏追封清河郡夫人考諱貢將仕佐郎同管勾蘆瀝塩場贈中奉大夫吏部尚書護軍追封清河郡公謚孝靖妣弭氏追封清河郡夫人元氏蓋拓跋魏之苗裔南北轉徙不知所

系家清河者至公四世矣享年五十有四其文有賦五詩凡一百六十三銘贊傳記五十九序三十雜著十五碑誌一百三十出入秦漢之間本之於六經以涵泳其膏澤叅之於諸子百家以騁其辨刻而不見其迹新而必自己出蔚乎其華擊鐘乎其古聲倡古學於當世為一代之宗文者柳城姚燧暨公而已信乎其必傳也雖然才用而未盡積厚而施寡微之於天其善後也無疑祖常曩從公游又公考士又辱茅下列義當銘銘曰

於維公文並古立大沛厥辭世莫躋震讐聳蹟力不克蜚聲天衢名薤薤位臻公卿戮軌跡蘊而不施用弗極神柩其馳學廼碩天藻挾縟琢圭璧五十四年反玄宅

集賢直學士貢文靖公神道碑銘

天曆二年十月朔旦集賢直學士貢公歿於家越五年為元統甲戌其子師謙來官京師以公之行治泣請于朝

天子贈公翰林直學士太中大夫輕車都尉追封廣陵郡侯謚曰文靖集賢臣顯又奉詔令臣

考公族世里居官次蹟業之實賜師謙以刻于石以寵賚貢氏之家以勸朝著師謙知臣於其父宿有好也廼錄翰林修撰臣李黼編緝之狀授臣曰先臣之生其有所自立其流聲美於人其可以傳世而善後者孤不敢贊已維墓有碑實後嗣所以記先人之德而飭其千百世子孫于無窮者今幸得以承

聖天子明詔以請焉其足以稱碑辭而無慙者公幸張之臣叙曰公姓貢氏諱奎字仲章其先大名蒲城縣人七世祖祖文以武德大夫扈宋

渡江繇鍾陵徙居宣城之南湖因家焉曾王父大用王父應寔宋承節郎以公貴贈中順大夫禮部侍郎上騎都尉追封廣陵郡伯妣黃氏廣陵郡君父士濟累贈亞中大夫秘書太監輕車都尉追封廣陵郡侯甫寇以詞賦試漕司中程明年黜於儀曹即自訟曰學之時其道未足以為己志已在於為人亦可謂謬用其心矣謬用其心雖有志於為人其能乎哉乃力自學行詠歌息偃以忘其年視世俗之好無足累心者獨愛公甚於他子曰三郎和易端厚穎悟若過人

者吾世有蘊德發必在是兒也公年十歲輒能屬文已有聞於人及壯讀書并日夜忘寢食於經子史傳無所不治於其章義辭句類數名制委曲纖妙無不究詣於文章辯議閑放雋俛不狃卑近必以古題故出而名振江之南初被漵省檄為池州齊山書院山長終更謁選吏部時天下久平大臣常欲引海內儒學之士聚之館閣所以長養其才而待上之用公亦欲以功名自顯果於自立故不為非常苟異之節而清約才博之譽大夫士翕稱之大德六年中書奏授

公太常奉禮

兼檢討上書言先王之制禮雖

節文有經而本誠貴質惟不蔽於禮之文而得禮之意則可以對越而無慊不然煩為之節無益也朝廷多採其議九年遷翰林國史院編脩官至大元年轉應奉翰林文字階將仕郎預修成廟實錄丁秘書府君艱比京師至家毀瘠禿然言不能聲太夫人見之曰尔嗣業於祖從事於朝少而學壯而仕父母曰是將大吾家隣曲曰是能華吾鄉宗人朋友之望尔猶是也尔父不幸死喪不有中制耶脱有諱非孝也始勉之

粥食以自強畚延祐元年服闋起除承事郎江西等處儒學提舉明年就官見列械署庭胥旁午走繫數人立吏持牘詣公署曰是學校吏報事愆期者公斥之曰金穀勾稽犴狴木索賤有司事爾吾以

天子命提舉儒學教吾職也刑奚以為悉命釋繫以械屬縣官大書其坐之屏曰讀書之中日有其益飲水之外他無所求與諸生講說文義為師弟子揖讓周旋日匡坐堂上人見其色和其容謹其言繹繹有理輒退而燕處聞其哦咏

之音若程工督計者故士之履恒滿戶外其及門者亦進不怠以心五年遷翰林待制預修仁廟實錄書成特賜金幣有差至治元年謁告歸里第與兄仲堅甫奉太夫人以居歛氣下聲昆弟相顧白首怡然鄉人皆樂與從之游至於羈旅游客其歸之者無不厭其意公於接之雖勤未嘗見懈色於資之衣食給物雖頻未嘗有所吝惜太夫人病竟夕立床第前聞太夫人咳息之出輒倚氣喘戚若以身代然者泰定元年太夫人卒三年復起公為翰林待制進承直郎

四年秋七月拜集賢直學士奉訓大夫秩從三品天曆元年

文宗即皇帝位冬十月上親祝香幣命公往祠北嶽淮濟南鎮二年春還自會稽涉吳中以疾歸卧於家至十月朔謂其姪師文曰吾夢夜賦詩有云竹樹蕭蕭夾泉石又云九轉丹成生羽翼不祥耐何語竟溘然以歿公有智識度量人

卷二

三

天子裸太室者一皆肅恭靈神虔致上意為使而不疚於偵賄不煩於有司攝官而峻事無違禮是皆公行之微而世亦不能及也然公負有為之志不得盡見於事於勢利之會又不求機以投合取顯以其故終於館閣文藝之職而人之被其澤者蓋鈔嗚呼此人之所以為公惜公之所以為公考知以而臣以此悼公者也公一時之與交者吳清河元明善東平王士熙四明袁楠巴西鄧文原長沙文矩悉當世豪傑聲名之士若臣者亦公之所厚故於公之碑得以盡

臣之言焉而非私也公以歿之明年正月八日
庚申葬宣城縣新亭鄉生田里之原享年六十
有一母夫人李氏追封廣陵郡夫人配張氏封
寧國郡夫人進贈廣陵郡太夫人子男二人師
謙從仕郎集賢院照磨師泰由胃子試中程授
從仕郎太和州判官辟署江淝省掾曹女一人
適阮皇孫男三人高山奴吳山奴萊山奴孫女
六人其所署曰雲林小藁曰聽雪齋曰青山謗
吟曰倦游集曰豫章藁曰上元新錄曰南州紀
行凡百有廿卷晚年粹擷諸禮書為一家言未

就而卒今師讜師泰皆孝弟純篤緝學以世其
家加之以磨礱灌養之功而不止其所至方未
艾也論次終始作為銘章豈特以榮貢氏以慰
其孫子以勸以侈以貽其鄉里哉將以昭聖天
子褒優儒臣之意以垂盛世之鴻懿也謹再拜
稽首為銘以獻曰

貢氏來北肇自武德蓋其忠威光彼南國有善
自身乃開承節繼屬綿綿其承有奕秘書有子
以文起仕奮蹟太常旋書帝制有疑其容志賦
萬里大騁瑰辭綜經緯史始采玉堂騰聲其駕

惟長在右惟同在亞在側惟察相頌歎訝公夷
坦坦弗矜愈下銓覈再試士曰予歸讀卷廷中
帝曰予依淮濟吳越四周所覆公馬駢駢持幣
奔走神歆公虔蓄祉以茂式久在序侍從之班
告疾歸心幾佚于閑竹水以居南湖之山公出
公休鄉人嘖嘖廩餘者粟與黨及隣屋藏有書
遺其後人素領丹頤墮焉以怡言笑在耳乃哭
于帷繼公德善歿不見其窮維公所著傳不見
其終有嘉二孥且用未極其崇維儉于厥躬永
也其鳴刻銘墓宮豎江之東有萬子孫紹美于

公

大元贈中奉大夫行中書省叅知政事

張公神道碑

公諱昂霄字雲卿姓張氏其先世居定州五代
時晉高祖割燕薊諸州賂契丹又徙鎮定民以
實平營故今為平州人金末擾亂世謀無所稽
祖伯韜有文學不仕讀書授徒為鄉人俎豆師
生鑑鑑為海山縣丞有惠政娶聞士程虞卿女
有子三人長即公次冲霄仕平州酒稅醋使以
卒次平霄副鎮江丹陽酒稅醋務歿贈官從仕

郎保定路易州判官公力孝悌尚學術敦慎以睦宗族子姓稱賴無有間言國文檄文臣詣都邑試士人學中程者復其家公首以詞賦備選至元七年辟署平灤路轉運司知事十年階前資提舉北京平準行用庫克勤厲守成較然有聲終更序績遷管勾濟民監傷顧子弟曰曲直有施而莫盡材予豈能僂俛中括匠繩度者而或予強也惠幼禮長葺力食生知天德自貴於物而行苟不忤人道殆其盡於茲已奚必仕而為榮為得祿哉於是居閑益講詩書六藝之學

置諸生左右撫掇前聞公釐辨對俾達所趣內熙外易慥慥眈眈對客燕二語及古今人物賢否事後成敗利鈍若水斷縵緝悉有左契每臨筆為文辭必緣情稽類不峭澀艱遠而夷然有古作者風意歲時從容課僮僕治生業往來里閭十有餘載無忿氣無慢容殆依依乎厚君子也以至元廿五年秋七月二十有四日考終于家享年七十其年十月某日葬平州西苑家莊之原子男九人長諱杲卒海山縣酒稅醋使次諱某早世次諱昱同監昌黎縣酒稅卒次名昇

今奎章閣大學士資善大夫為時名臣次名昆承務郎陝西等處儒學提舉次諱曇少知好禮讀書日記數千百言弱冠為兵曹掾聞其師滕司業卒中山謀請臨哭其喪例不許因棄掾得就哭還金教務自多學記覽以博其用而不幸亦卒次名晟承直郎真定路藁城縣尹次諱晟既冠而世次曰旦承事郎遼陽行省照磨官女一人適士人劉源男孫凡十有三人曰璵監安豐路霍丘縣酒稅曰琳學而未仕曰山童天曰璵將仕郎章佩監知事曰琦從仕郎隆鎮衛千

戶所知事曰琪甫冠卒曰仁童曰居安曰鯨川皆天曰瓚國子生曰琥未冠卒曰珪曰琢幼而學曾孫男三人曰紹安慙見范陽玄孫男三人曰元孫聞孫定孫皆幼孫女五人長適同監馬城縣務趙簡先卒次又適簡次適遷安趙辟次適大寧楊誠次名賽未笄卒曾孫女二人曰高曰順玄孫女一人幼未名恭定二年以公子昇時官階二品例推恩二代鑑皇贈嘉議大夫禮部尚書上輕車都尉追封北平郡公妻程氏追封北平郡夫人公皇贈中奉大夫河南江北行

中書省叅知政事護軍追封北平郡公初娶白氏卒繼室故元師龍德讓女宜家訓子成其內助而先公十九年卒追封北平郡夫人再娶夫人妹後公廿年卒國制諸夫人當封者格心一人昇以妻封讓後夫人龍氏得請亦追封北平郡夫人咸祔塋公塋禮也至順四年春集賢侍講學士昇以狀屬其門生馬祖常維不獲拜公而辱公子昇知寂久跡其尹汝南焚禁書以全逮繫治越州忤權臣以逭民賦及敷厯臺省則又有猷有為而公之流聲遺澤可考而知矣嗚

呼燕營間山川磅礴鬱積之交鐘而為人者發舒凝蓄固有晦有明而豪俊瑰瑋之器世恒見之豈不以其稟之厚歟公生當草昧之初能知讀書業儒而躬不食其報殆所謂稟之厚而未顯者也不然胡寧公卒甫五十年而張氏之門躋膺仕紆章綬者充然滿廷耶是豈特因公之緒以知公又將驗夫燕營間靈明之所鍾也廼為之銘曰

在燕營陬有鬱平州藹其焯焯孰涵以收張氏德門實會其休王父伯韜肇茲善慶間閔以生

乃起厥問積厚而微勃焉其奮寔生縣丞揮于
惠政世濟其美伊自公始既穀既官而屹其心
曰熙曰勤以淋有子維德之微爰受多祔後五
十年燁其有侈于公于侯籩豆承祀綏冕率服
馬奕委委昇也履之公實啓之有封馬鬣神安
居之本哉沅沅迪尔後昆矢許貞石式昭覃恩

石田先生文集卷第十一



石田先生文集卷第十二

碑誌

致仕禮部尚書邢公神道碑銘

恭定二年四月十四日致仕禮部尚書邢公卒
六月朔葬于安陽度置之原越二年致和元年
戊辰二月嗣子溫毀瘠纍然喪服持工部侍郎
胡彝行狀告其友浚儀馬祖常曰先考衣衾棺
槨飾終之禮庶幾無悔溫不孝惟是墓道之碑
無文以昭之敢以是託於子焉按狀公諱秉仁
字仁父姬姓邢氏世居安陽契丹女真擾中夏

三十一

卷十二

二

士族譜牒存者蓋寡故安陽邢氏始顯交口里
大父諱植不仕有陰德贈亞中大夫彰德路總
管輕車都尉追封河間郡侯大母李氏追封河
間郡夫人父諱德裕有政事材志不得奮發卒
小官贈嘉議大夫上輕車都尉追封河間郡侯
母王氏追封河間郡夫人繼母郭氏封河間郡
太夫人第四人曰秉義秉禮秉智秉信四人皆
後夫人郭氏出前夫人王氏獨生公一人兩世
用是貴得加封光華甚榮公起家辟署河南廉
訪司曹屬進御史府史又進丞相東曹掾滿考

授承務郎平江路推官未上改承直郎濟南萊蕪等處鐵冶等提舉俄遷承德郎江西行中書省左右司都事陞朝列大夫為太醫院都事選充廣平彰德等處鐵冶都提舉官中議大夫外臺各以名薦尋為撫州路總管加亞中大夫廣平路總管凡十遷以禮部尚書致仕階承務郎至嘉議大夫凡六轉出入中外率稱官守初提舉濟南諸冶賦民不急逋逃復業都事江西行省婉畫直辭贊叶上下議遣官出廩米五十萬石賑貸屬州飢衆難之公請異日有擅發罪乘

仁願獨坐萬齒斷斷待餉以活者不可指數也都提舉廣平彰德等諸冶差戶程功礪火悉給縮賈殖復以利予農治辦為家總管撫州專使臨門賜駟之官撫境地稅戶部賦木綿織布民病非所產即令輸直吏不得舞手取賄公私俱便之小旱禱輒雨歲連大穰俗頗謹訐未幾民恥健訟移廣平路教學者以雅樂祠事先聖孔子立鄉校七百各有弟子師課樹桑億萬計絲纊用饒民有婦妬妾姪而以妾妻奴者夫死而族人欲有其家訟不決廼以子生月送計母妻

奴之時得實其民遂有後閩郡號神明盜偽以小鈔貫文作大鈔貫文如錢取鎔然註誤七十人心以首坐勸醫講黃帝越人書躬視惠民藥餌比去官民鮮天札者賦有寸帛之羨立歸之主為政具有方略要以惠恤元元為本既致仕益礪志讀書強記不怠字書多楷法尤工古隸有子二人長子溫由中書檢校官拜監察御史吏部中書左司二郎中總管大名河間都轉運使丁公艱家居次子簡門蔭補承事郎監大名路商稅夫人蕭氏于氏祔葬並追封河間郡夫

人享年七十有六嗚呼行聞于鄉政聞于時為子而上貢其親為父而垂裕于後可謂完也矣為善人者可不以邢氏為徵耶是宜銘也銘曰爾車薄薄爾馬蹻蹻勿驅我隧域時君子宅有繹爾蘇有焦爾芻毋犯我松與萋時君子居若廣漢之明弗鉤距以傾若霸之惠弗飾異以詭時予有元之循吏孫子奕奕時昌時赫時善維吉時視予貞刻

僉燕南河北道肅政廉訪司事趙公神道碑

相州安陽縣之趙氏有起郡掾為燕南河北道
肅政廉訪司事以歿者諱思恭以吏治見於世
其墓在安陽之吳村原葬之三十九年有子天
綱亦起憲府掾為監察御史乃始請刑部郎中
蘇天爵狀其行拜而乞銘于浚儀馬祖常其序
曰趙氏安陽金有徙磁之滏陽者諱秉文仕至
禮部尚書別為滏陽趙氏其留安陽者族世遠
不能譜公曾祖諱德德生溫溫生仁仁起家同
知鈞州公鈞州之子尚書之從孫也少讀書通
其理亂得失之大旨尤愛治刑名書律欲以其

所為思一有所奮成名蹟于世當是時天下甫
定權貴人多出功戰為士者寡公獨於問學辨
說法制數度上下委折之微有足徵者年十九
聲聞于鄉郡侯高鳴辟掾郡中稱其廉平久之
貢中書刑部曹轉大司農掾其立意施事詳於
利人而略於便己以故一時名公卿咸禮譽焉
至元十六年始官從仕郎宣徽照磨管勾架閣
未幾為主事尋遷經歷宣徽掌凡內饗外饗天
子儲后侯王卿士食飲膳羞酒醴醕脩醢醬之
共事素叢劇公在職十年所為問義理何如不

毫髮願計絲考粒絜以叅核出內姦弊無所逞
臺臣上公之材擢拜燕南河北提刑按察司判
官階承德郎居官號為辨治入拜監察御史時
山北歲凶公請亟發粟賑貸廷議檄公就行至
則施民所宜便曲調繼之賴以活者至萬數人
其所論於上多同列所不敢言者其已嘗言則
不綴以言曰無撓法害治足矣然排幸貴黨佞
為獨切所言有以儆世者歲二月八日京師迎
佛解祠于城西流外諸司集與其役織染局使
儲普華倚時相受賕公糾以灑時相怒召公政

事堂詰曰國家歲祠佛以徼善利君獨沮不虔
邪公具事實從容論其罪時相為歎息許之俾
治如律先是宰相以戶曹金穀工曹興役簿書
浸溢吏滋多不灑請御史雜治之公分治工曹
蓋累月而後理或曰君敢為而能敏今若此何
滯緩也公笑曰是固人之所能易也而我則不
能且是舉也朝廷豈以為它亦曰慎材用黜冗
節浮而已今不深察其原悉而苟簡以為之人
雖以我能敏後有不勝其弊者已而果用文吏
覆覈無緇銖舛衆始服公識慮之周密也除大

司農司經歷轉奉政大夫嘗與其長議務農重
本十事入陳上前上獨頷公令即施行之廿八
年詔改提刑按察為肅政廉訪司擢公僉河北
河南道肅政廉訪司事頃之移燕南河北至元
元貞之間四海久平繩吏法寬縱吏相習為沉
浮幸終更去或按一吏則群詆以刻暴職是事
積不治而敝日以及民矣公僉事兩道約其民
以聽古靈陳氏之訓按其吏獨嚴法無所憊恕
聽其訟必詰折得其情所為者使自服訟以故
少人以故無所究其巡警都邑必首率博士第

子貧謁孔子庭外堂誦說導以禮治以其故所
至不獨吏有所畏而民亦樂有勸焉其事親能
得其歡其過人和易質厚不為畦穿其處宗戚
疏近有恩於其先世田廬獨取其疏弊而完饒
者推以與諸弟妹於亟人之窮汲汲若不有獲
自與衣服飲食尤儉以約既老讀書不去手尤
喜陸宣公奏議真文忠公大學衍義曰是真臨
官治民事君日益者故其叢為論議措之事為
多為世所稱其嘗所慕好若魯齋許公靜脩劉
公悉當世豪傑拔特之士其嘗所薦引若保定

郭貫張仲實滏陽安祐洛水劉廣者後尤有聞
于時其字仲敬其壽五十有八其歿以元貞二
年十一月望日在大名之官舍其葬以是年十
二月八日其妣張氏其配焦氏焦金世大家代
有聞人後公廿五年歿壽八十合葬公墓其子
男三人侃蚤卒天綱由御史大夫掾為涑東廉
訪司經歷拜江南行臺監察御史入拜監察御
史清慎端慤為世名人天經補公廕主獲嘉縣
簿調翼寧錄事卒女二人適主簿王蔚涑西廉
訪僉事傅汝礪其孫男三人曰植天曰構為江

涑行省掾史曰楷讀書未仕孫女一人適士子
咎某嗚呼三代警宗米廩教養之制既壞人人
不得成其材久矣漢以來時有赴功立事之會
則材臣辨士技謀智諛之人比跡同世若恒有
餘時或至用無其會則徃徃瑰瑋雄奇之人亦
且無見於世蓋其窮阨委逸於草澤市里之中
者豈少哉若公之材識器術又其德善如此且
當赴功立事之會嘗有位于朝而不得極其志
以駿暴於世抑豈非其會也夫然公歿而有子
為名御史嚮時用豈其碩大光顯又將在茲歟

若公者亦可謂特見自立之士矣銘諸石使知公之不大顯以極其志也銘曰

時需厥人用或乖應適其會否能諧公躬智藝稱世材發聞秋官耀中臺驅磔虺域勅騶豺蟠信瘦甦培厥栽謂極其志延中摧其生可嘉死足氣有懿孫子瑤與瑰殖是福祿公所開忠名孝績宜無涯噫乎公乎鬱余懷山朝于濟下維隈刻碑高原貽後來

勅賜贈叅知政事胡魏公神道碑

卷十二

皇帝御咸寧殿御史大夫臣某侍御史臣普化

奏言侍御史臣彝服勞官常夙夜殫忠力以稱所使蒙陛下器選為臺臣秩第二品得贈其父官中奉大夫職江淞等處行中書省叅知政事勲護軍爵魏郡公蓋所以慰寵胡氏以昭其先人之善者既鴻奕已臣彝將叙緝其家之望郡系世及其父祖妣之休聞實澤刻書于碑圖久不泯以侈陛下之賜以賁其鄉里以勸其後孫子於亡極彝惶懼未敢以聞惟陛下哀憐之制曰可乃勅臣祖常為製其辭臣昧死叙列以進曰胡氏遠出于舜周武王時有封於陳為舜後

者曰胡公至春秋之世楚滅陳子孫轉徙曰氏胡為犛姓其後仕於漢曰建曰廣者以勲名著厯魏迄唐大有聞人金之末鄆陵之胡氏徙相州之安陽縣公諱景先字彥明相州安陽人也少端默有遠操內自脩飭不求當世之譽樂其所守謂竅術求榮不多於竭力以供子職枉已逐物不賢於隱居以遂吾志故事親為學力田業生以終其世於貴富寵炎未嘗動於意兄歿事寡嫂岳尤盡禮畜其孤某如已子里人有貸錢為本業子本相埒至萬十數貧莫能償主責

之棘聲自經公捐貲與償之里人謝為券質公所公火其券歲大侵出廩實以賙其鄉既匱又賣田繼之至熟人將酬之不受隣有喪子弱貧無所有公為具飯含衣被棺木以斂藏之恤其孥既長俾有家願傭以報不許盜有竊其牛羊者又竊所乘馬公知賊處一不問人嘗具饌奉公公肉而甘召庖人問人曰燔能澤濡能焦味奚是適庖對以法上下釜皆新鑄合肉其中密其款頂趾加火焉公曰毋得釜損乎味於適而器於弊吾弗忍其平居恂恂恭謹遇人無歲䟽

豁然無機噎或欺罔之不以變春秋高矣出入
閭里嘗却車馬不御與故人父老游或具几杖
亦不扶以故鄉人皆德其善而嚮其莊不忍以
字稱之尊之謂翁其長者語其子弟必教以公
為法曰為人若胡翁足矣其歿也惇寡饑饉難
亟患阨之人相值必曰胡翁之亡俾吾無所控
恃致和元年二月六日方與親戚高會言笑如
平時忽舉手謝客匡坐而歿得壽八十以其年
五月十日葬安陽縣孝明村之原初封奉訓大
夫載封朝請大夫同簽太常禮儀院事騎都尉

安定郡伯進封翰林直學士亞中大夫輕車都
尉安定郡侯累贈魏郡公夫人王氏亦鄆陵望
族慈孝貞靜處親族遠近長幼間盡其宜嚴饋
祀親紉縫澣濯至老而無懈容事夫能成其志
教子能成其材彞官于朝閭里以為夫人榮而
卒不見其喜彞官題以貧匱不足於養為憂輒
喜曰此吾所以教子也彞居魏公艱服除起拜
陝西行臺治書侍御史夫人諱就養心之曰西
臺臨四省四憲朝廷倚為重地且秦中歲饑是
諱豈義之急病讓夷者而忘而父之訓耶後公

三年六月六日卒。祔公墓。累贈魏郡夫人。臣嘗銘其壙。子二人。曰彞。由丞相掾起家。為工部主事。官十轉。為中奉大夫。職十有二。遷為侍御史。曰規。兵部曹女三人。適鄭某。王某。李某。皆士族。孫二人。敬伯。侍儀舍人。柏壽。尚幼。孫女二人。適大司農侯公孫某。樊某。臣嘗聞彞為河南行省左右司員外郎時。河南大饑。使告發者如繹。省臣以格未即許。彞時代判省。續廼專發米三十萬石。所活五十餘萬人。其為河西隴右僉憲。隴右地極邊。吏往往濶略。乾沒無所。願彞按擿

繩姦賊。墨坐者十有一人。釋濫繫者八人。沒贓四百五十萬緡。其為右司都事。有以西域僧卜兆言。釋重囚以解除者。中貴人傳旨。引富人子當死者。至內建將脫械。彞白宰相。置之獄。其為御史。為員外郎。左司所言於上。悉同案。所不能且不敢言者。臨事裁決。引大體。略細故。矯矯無所屈。又聞其為尚書戶部也。

天子入正大統。故典親王宗臣庶官衛士錫予之數。為金幣穀帛。以萬萬計。時浹月間。舉故典者。再執事者。請括金民間。以充用。時廷臣多是

其議彛獨以為不便乃稽諸內府之隱覈郡縣
上供之實與內帑歲積之羨不給則令鹽商入
銀以準幣大朝會遂無關事臣攝官御史中丞
知經筵事實與彛同署又見其闡翼憲紀糾繩
官衮入侍講惺考質經義究觀前世之變而至
夫理亂興壞之際必委悉焉此彛之事臣得之
於耳目者士論咸以誦彛而彛之語臣必曰魏
公之教不敢忘嘻觀彛之事而質以其言蓋可
以知公矣考諱用璋踈達明信不肯為自欺以
德行化其鄉曲隣有棗樹歲秋實積墜舍旁地

命左右拾以歸其主與人交不矯矯以異亦不
翕翕以同以故人莫能親踈之居嘗自號曰陶
然翁嘗語公謂胡氏之先世大業有緼德未菽
當後有食其報者至彛果顯用為賢臣亡妣祝
氏脩身理家有懿則其智識德量過人遠甚畜
馬有夜盲者僮擅面謗市人取直以媚夫人遽
叱還其直且謝曰僮不以質言而輒汝給吾不
忍也以彛貴皇贈嘉議大夫吏部尚書上輕車
都尉魏郡侯祝氏魏郡夫人喜觀公考妣之事
而徵以公之善尤足以知公世德之遠哉初吏

部與其第弟起鄆陵提家北絕河來相第弟皆
還鄆陵而吏部獨考室于相焉其先嘗繼為宗
金顯官而天興剽薙之餘雖鄆陵葬有塋塋有
碑石剝泐文不可識故其世莫得而詳然胡氏
陳胡公之後於陳氏國分姓也昔漢陳太丘之
仁鬱抑於當世而紀諶群泰貴顯者數世豈魏
公之先既有榮名而子孫逢時不祥又有翳善
晦德如太丘者乎不者何後世之碩大蕃與若
是臣又知彝之孫子貴顯尚未艾也臣奉詔以
國子博士臣沂原大敷懿之狀考公子之所履

以求公之世而得公之言行如此於是謹為之
銘曰

周有胡公賓王續聖陳墟姓別昉氏安定曰建
曰廣漢樹顯聞亦有威奮蜚聲魏晉彌宋涉唐
代奕其教子孫世食占徙靡常既又抑阨載遷
安陽維安陽里其承有煒吏部之孫魏公之子
謹議侃侃稱

天子使天子曰嗟彝侍御史工協于極邦肅于
紀咨予爾嘉懋正厥事彝拜稽首臣昔筮仕左
右致養以官就侍

天子之仁既多受祉臣罪不穀失我怙恃帝閔
臣孤賚之慶貶有爵有官秩躋第二生則孔榮
歿顯亦熾維昔魏公殖善弗匱備樂孝養亦又
多譽發祥在彝實興佐時維皇好德是緝公熙
肆厚厥有乃永其貽繩繩胤似勿替承之鄆城
之野既封既樹相城北西亦有新墓帝錫之碑
昌此文壽百世其延庸勗爾胄

安定郡夫人王氏墓誌銘

夫人王氏故贈翰林直學士安定郡侯胡公諱
某之夫人陝西諸道行御史臺治書侍御史彝

之母也世為浚都鄆陵人父諱貞伯始宅安穀
由地官屬出主襄陽穀城二縣簿夫人在父母
家時雖鍾愛於其親而食與衣常後於兄嫂及
歸胡氏事安定公持婦道終其身無懈容親紡
績組紉之工弗好世之侈靡華飾以儉以勤相
安定公家政卒能有成慈睦仁祥族姻茫之夫
人有子二人長即治書次規業儒山東憲府辟
署書吏補典寶監令史治書甫卅夫人謂安定
公曰是兒資穎悟可令早就學也遂求經師講
先王禮樂詩書之義善屬文未冠令譽日著起

家為大都路儒學錄大都四方髦俊輻湊於是
治書學益碩大名益光顯矣省臺交薦于上厯
監察御史右司都事左司員外郎工部侍郎丁
安定公艱吉服浹月即拜今官使者及門致禮
意敦請治書以侍夫人榮養為緯夫人曰兒來
前吾有訓汝承吾志吾逮事舅姑汝先考及我
教汝胡氏之宗事其在汝乎今國家命汝為臺
臣西南四省四憲府之評議屬之汝其速行毋
以我養為辭焉治書上事半月夫人訃至徒御
不戒號泣東出及安陽喪次銜哀具書告其友

馬祖常曰彝不孝先妣安定郡夫人以至順元
年六月六日卒將以七月三日祔葬於先考安
定郡侯之墓里人杜愚為之狀矣請吾友為埋
銘以刻之嗚呼人之生有男女焉幸而為男子
或有所樹立於世則不與百物俱盡幸而為男
子矣無所樹立使人惡之惟恐其久生而何死
之恤也夫人女子也為女而能賢為婦而能孝
為母而能慈從其夫子有官有封其所樹立殆
過男子矣宜乎富貴壽考享厚生之福也歟祖
常與治書同學古文使為銘義不讓廼銘而授

諸來者銘曰

在相安陽有貞慈母啓封湯沐賦安陽畝燁其
輝光夫人象服柔嘉有儀百麗于福少也稚弱
玉節閨房歸于夫家組紉含章教子俎豆不繫
于遷弗靡其全而人咸天詩書禮樂六藝之師
起其施施居其孜孜迺成治書懋官臺臣又成
典寶克昌克寅克昌克寅亦既多泚善後無疑
譬彼種稂我稼則穫且痔錢鏹洹泉出山紆流
相西鬱鬱柏松蒼蔚之隣允矣安定幽宮是域
夫人之協其龜食孫子爰殖我銘不泐

三四

卷二

志

故榮祿大夫大司農卿郝公墓誌銘

公諱某字景文霸州信安人也弱冠起家給事
裕皇邸以才知名至元二十年擢揚州路治中
二十二年遷同知淮西道宣慰司事又遷江淮
等處財賦總管江淮吏牘有令察司不按勅公
受命陞辟懇請許察司按勅財賦吏牘然後臣
敢行詔獎喻而從之未幾丁太夫人艱扶柩歸
葬斬衰哭泣居墓廬數月過常制近臣以聞成廟
遣使賜食品憫勞焉細紳大夫咸榮美之服除
會兩淮鹽法壞吏因緣大賈相為奸國獻單弱

撻錢售不得食鹽益翔貴州縣上狀詔公行戶部尚書乘傳往治既至督淮南轉運司漕輓廩鹽之在鹽官者輸倉民主之閱其書之次以為先後販者不得賄吏破其囊橐均利於衆大德八年正授工部尚書改戶部尚書至大元年拜中書叅知政事二年遷尚書叅知政事階榮祿大夫公固諱不允乃就職歲餘以疾力諱杜門家居後尚書省臣果有罪伏辜公愈不以能退自喜獨雍容灌園種樹無資則持器物鬻之八年履跡不過中門游從之士已知其無志於一世矣屬延祐

天子思用有經術之臣命中書即家起公為大司農卿間又病免

上以侍醫視藥存問公雖病猶以國憂而其言語未嘗及其私也延祐七年三月十一日終于所居之正寢享年六十有二公祖某贈資德大夫尚書右丞謚康靖考某贈榮祿大夫司徒謚孝懿並追封薊國公祖妣賈氏妣弭氏並追封薊國夫人夫人李氏先公十年卒男子二人長曰升次曰謙早世女子二人皆幼按郝氏出太

原郝鄉所謂以鄉為氏者也其世之或仕或學
列于史官者尚矣然以才譖選進而為股肱之
臣者幾何人哉進而為股肱施其贊襄謀畫者
又幾何人哉則郝氏之世自公尤顯矣公少俊
偉慷慨能國語長博通古今經世之學教用之
應驗如占筮稽考生王宗廟朝廷鍾鼎欵識旁
及百家之書而推愛親黨撫摩其孤者又純篤
無偽嗚呼書傳所傳愷悌大雅之君子舍公其
誰與今亡矣悲夫其子外將以是月二十一日
葬公于都城西山之麓之原知公實深敢不哭
而為銘曰

卷十三

七



雲為兩星為石星石可泐名不斲嗚呼善人保
窀穸

石田先生文集卷第十二

